

ANALI GAZI HUSREV-BEGOVE
BIBLIOTEKE

Knjiga XXI-XXII

RIJEČ UREDNIKA

Od posljednjeg objavljenog sveska *Anala Gazi Husrev-begove biblioteke* (knjiga broj XIX-XX), koji je štampan 2001. godine, u Gazi Husrev-begovoj biblioteci uradilo se mnogo poslova vrijednih spomena i posebne pažnje.

I

Prvo, objavljena su četiri nova sveska Kataloga GHB, i to:

- *Katalog arapskih, turskih, perzijskih i bosanskih rukopisa*, sv. IX; obradio hafiz Haso Popara. Ovaj svezak kataloga sadrži rukopise iz oblasti fikha, a štampan je 2001. godine.

- *Katalog arapskih, turskih, perzijskih i bosanskih rukopisa*, sv. X; obradio Osman Lavić. I ovaj svezak je također iz područja fikha, a štampan je 2002. godine.

- *Katalog arapskih, turskih, perzijskih i bosanskih rukopisa*, sv. XI; obradio Zejnil Fajić. Jedanaesti svezak kataloga štampan je 2003. godine i bavi se rukopisima s područja Kur'ana, hadisa, tefsira, tedžvida te dovama. To je bila i tematika prvog sveska kataloga GHB koji je uradio rahmetli Kasim ef. Dobrača.

- *Katalog arapskih, turskih, perzijskih i bosanskih rukopisa*, sv. XII, obradio mr. Mustafa Jahić, a svezak je objavljen također 2002. godine. Sadrži rukopise iz oblasti prirodnih nauka.

Kad smo kod kataloga, recimo da je u odmakloj fazi rad na XIII i XIV svesku i njihovo objavljivanje i štampanje treba očekivati uskoro.

Objavljivanjem XIII i XIV sveska katalogizacijom će biti obuhvaćene sve oblasti rukopisnih fondova GHB.

Ovakav uspjeh i efikasnost u radu na katalozima i njihovom objavljivanju ne bi bilo lahko postići da nije izuzetno uspješne saradnje Gazi Husrev-begove biblioteke i *Al-Furqana*, Fondacije za islamsko

kulturno naslijeđe sa sjedištem u Londonu, koju je osnovao gospodin Ahmed Zeki Yamani, bivši ministar za naftu Kraljevine Saudijske Arabije. Napominjemo da je fondacija *Al-Furqan* suizdavač ovih kataloga zajedno sa Rijasetom IZ-e u Bosni i Hercegovini.

U vrijeme kad su itekako oskudna materijalna sredstva koja Gazi Husrev-begova biblioteka i Rijaset Islamske zajednice mogu izdvojiti za štampanje kataloga, saradnja koju je mr. Mustafa Jahić, direktor GH biblioteke, ostvario sa *Al-Furqanom* zaslužuje da se posebno spomene.

II

Drugo što želimo istaći također je u vezi sa rukopisnim fondovima GH biblioteke. Naime, radosna je vijest da je najveći dio rukopisa ove institucije mikrofilmovan, a oko 95% mikrofilmovane građe pohranjeno je na čuvanje na raznim lokacijama u Bosni i Hercegovini i u svijetu.

Također je nastavljen rad na skeniranju odabranih rukopisa po najnovijim tehnološkim metodama. Dosada je skenirano oko 1500 kodeksa i pohranjeno u digitalnoj formi.

III

Biblioteka uspješno saraduje sa srodnim institucijama u zemlji i svijetu, a posebno ističemo uspješnu saradnju sa već spomenutom fondacijom *Al-Furqan*, zatim sa institutom Jum'a Majid iz Ujedinjenih Arapskih Emirata te Centrom za proučavanje islamske povijesti, kulture i umjetnosti (IRCICA) iz Istanbula. Napomenimo da je u protekle dvije godine prof. dr. Ekmeleddin Ihsanoğlu, generalni direktor IRCICA-e, dva puta posjetio GH biblioteku i interesirao se za njen rad.

IV

S posebnom radošću u ovoj uredničkoj besjedi napominjemo da su obavljene sve potrebne pripreme za početak gradnje nove zgrade GH biblioteke, a tokom jula 2003. godine položen je i sam kamen-temeljac. Građevinski radovi očekuju se već u ovoj godini.

Ovdje sa zadovoljstvom treba spomenuti da su reisu-l-ulema Islamske zajednice u Bosni i Hercegovini, prof. dr. Mustafa ef. Cerić, i direktor GH biblioteke mr. Mustafa Jahić uložili velike napore u iznalaženju

donacija za izgradnju novog zdanja Biblioteke. Država Qatar je na najvišem nivou prihvatila finansiranje ovog projekta, što treba posebno spomenuti uz sve znake zahvalnosti.

V

Na kraju recimo da ovaj svezak *Anala GH biblioteke* koncepcijom ne odstupa od utvrvene tradicije do koje se došlo u ovom časopisu. Čitatelji će naći zanimljive priloge koji se temelje prije svega na rukopisnim fondovima GH biblioteke.

U ovom broju *Anala* donosimo i nekoliko poglavlja iz magistarskih radnji odbranijenih na Fakultetu islamskih nauka tokom proteklih nekoliko godina. Ovim gestom, objavljivanjem poglavlja iz magistarskih radova, uredništvo želi čestitati mladim istraživačima i podstaći ih na daljnji rad.

U Sarajevu, augusta 2003.

Enes Karić

